

## სპარინგი "დნეპრთან"

თბილისი. ვ.ი. ლენინის სახელობის "დინამოს" სტადიონი. 11 სექტემბერი.

"დინამო" (თბილისი) – "დნეპრი" (დნეპროპეტროვსკი) 3:1 (2:0).

"დინამო": მქედლიძე (გაბელია), ხიზანიშვილი, ჩივაძე, ხინჩაგაშვილი, მუჯირი, დარასელია, სვანაძე, სულაქველიძე, მესხი, ცავა, შენგელია (ჯოხაძე).

"დნეპრი": კონსევიჩი, კუტუზოვი, დილაი, ბობრიკოვი, ლისენკო, დამინი (ლიტოვჩენკო), შურშინი (ლიუტი), სერებრიანსკი, უსტიმჩიკი, პოგორელოვი, ფედორენკო.

მსაჯი - კ. დორონინი (მოსკოვი).

სანამ უშუალოდ თამაშს შევხებოდე, მკითხველს შევთავაზებ საუბრის ნაწყვეტებს, რომელიც სწორედ "დნეპრთან" მატჩის წინ გაიმართა. "ნაწყვეტებს" იმიტომ, რომ ჩემი თანამოსაუბრის - "ნაპოლის" მეორე მწვრთნელის პაოლო სპეკიას შეხედულებები ფეხბურთის საკითხებზე, ბევრ რამეში ემთხვევა უეფა-ს გენერალური მდივნის ჰანს ბანგერტერის მიერ გამოთქმულ მოსაზრებებს. ბუნებრივია, ისევ მომიხდა ორიოდ დღის წინ მიცემული შეკითხვების გამეორება და ფეხბურთის მოყვარულს თავი რომ არ მოვაბეზრო, "ნაწყვეტებსაც" იმიტომ მივმართე.

მსოფლიო ჩემპიონატში "ცისფერთა" გამარჯვების შემდეგ ნებისმიერი იტალიელი სპეციალისტი ჟურნალისტისთვის, რომ იტყვიან, "ნუგბარი ლუკმა". ჩვენთვის ეს ინტერესი, "ნაპოლისთან" შეხვედრის წინ, რასაკვირველია ორმაგდება.

- არგენტინაში იტალიელებს საკმაოდ სიმპათიური გუნდი გყავდათ. წინასწარი შეხვედრების შემდეგ თქვენ ჩემპიონობის ერთ-ერთ მთავარ პრეტენდენტად გასახელებდნენ. როგორ აფასებდით იტალიის ნაკრების შანსებს ესპანეთის ჩემპიონატის წინ?

- სუსტი და უპრეტენზიო გუნდი იტალიელებს იშვიათად ჩამოუყვანიათ მსოფლიო ჩემპიონატებზე. იმის თქმაც შეიძლება, რომ ჩვენი ნაკრები ორიგინალური ტაქტიკის წყალობით ყოველთვის გამოირჩეოდა, მაგრამ ბოლო ჩემპიონატის დაწყებამდე ერთი დღით ადრეც კი ძნელი წარმოსადგენი იყო, რომ ყველაფერი ასე ილბლიანად დასრულდებოდა.

- სიტყვა "ილბლიანს" რაიმე დატვირთვას ანიჭებთ თუ სხვათა შორის იხმარეთ?

- ესპანეთის ჩემპიონატის მთავარი ნიშანი გუნდების კლასის ერთგვარი გათანაბრებაა. ამ პირობებში სპორტულ ილბალს თითქმის გადამწყვეტი მნიშვნელობა აქვს.

- თქვენ გინდათ თქვათ, რომ...

- დიახ, დიახ, რა თქმა უნდა, ყოველთვის არა, მაგრამ რამდენიმე მატჩში, განსაკუთრებით კი ბრაზილიელებთან, აშკარად გვწყალობდა ბედი. თვითონ განსაჯეთ, იტალიელებმა გამოიყენეს ყველა საგოლე მომენტი. ხომ შეიძლებოდა ერთ-ერთი იმ შეტევათაგანი გოლით არ დასრულებულიყო, ხომ შეიძლებოდა, რომელიმე დარტყმა მეკარეს მოეგერიებინა? იტალიამ ის გადამწყვეტი თამაში მოიგო, მაგრამ შესაძლებელია იმ პერიოდში ბრაზილიელებთან ათი მატჩი გვეთამაშა და ცხრა წაგვეგო. ცხადია, ფეხბურთში არსებობს ტექნიკა, ტაქტიკა, ათლეტური მომზადება, მაგრამ არ არსებობს აბსოლუტური ღირებულება, რომლის მიხედვითაც შედეგის ჭეშმარიტ ლოგიკურობაზე ვიმსჯელებდით. მით უფრო, კიდევ ერთხელ გავიმეორებ, დღეს, როცა გუნდებს შორის განსხვავება მინიმუმამდე შემცირდა.

- როგორ აფასებთ თქვენს შანსებს 15 სექტემბერს მატჩში?

- ვფიქრობ, "ნაპოლის" დიდი სიფრთხილე მართებს. მე დავესწარი "დინამოს" თამაშს "მეტალისტთან", რამდენიმე მატჩი ტელევიზიითაც ვნახე. მშვენიერი გუნდია. განსაკუთრებით მომწონს შენგელია, ჩივაძე, ცავა... გავიგე ყიფიანი ტოვებს დიდ ფეხბურთს...

- სამწუხაროდ, ასეა. წლევეანდელი სეზონის ბოლოს "დინამოს" სტადიონზე მოეწყობა დიდი სპორტიდან დავით ყიფიანის ოფიციალური გაცილება.

ჩემს თანამოსაუბრეს რაღაც სინანულისმაგვარი დაეტყო სახეზე.

- ქართული და იტალიური ფეხბურთის განმასხვავებელი ნიშნები?

- თბილისელთა თამაშში ნოდარ ახალკაცის მადლიანი ხელი იგრძნობა - "დინამოს" სათამაშო სქემას ერთობ მწყობრი, გეომეტრიული სახე აქვს. ამ თვალსაზრისით იტალიური კლუბები ცოტა არ იყოს, ჩამორჩებიან, სამაგიეროდ, ჩვენს გუნდებში მეტია იმპროვიზაცია.

- "ნაპოლის" სავარაუდო შემადგენლობაზე რაიმეს ხომ არ გვეტყოდით?

- ალბათ აზრი არა აქვს, - თქვა პაოლო სპეკიამ და დაამატა: - ნაღდი შემადგენლობა შესაძლოა სულ სხვაგვარი გამოდგეს - არ მინდა დეზინფორმატორის როლში აღმოვჩნდე.

ამასობაში თამაშიც დაიწყო.

მატჩს სპეციალისტებიცა და ფეხბურთის მოყვარულნიც ბუნებრივია, "ნაპოლისთან" მომავალი ორთაბრძოლის საზომით მიუდგნენ. "დნეპრი" უნებლიედ სპარინგ-პარტნიორის როლში აღმოჩნდა. ამ თვალსაზრისით საკმაოდ იმედისმომცემი გამოდგა პირველი ტაიმი. ორი გოლი სავსებით შეესატყვისება "დინამოს" სწრაფ და აზრიან თამაშს. მე-6 წუთზე ცაავა-შენგელია-მესხის კომბინაციას ისევ ცაავას დარტყმა და გოლი მოჰყვა - 1:0. თბილისელები სულის მოთქმის საშუალებას არ აძლევენ მეტოქეს. ყველაფრით იგრძნობა, რომ მასპინძლებს პირველ ტაიმშივე სურთ მატჩის ბედის გადაწყვეტა. მე-17 წუთზე ძელს ხვდება შენგელიას დარტყმული ბურთი, მერე მესხი კარგავს ანგარიშის გაზრდის კარგ შესაძლებლობას. 32-ე წუთზე "დინამომ" მაინც გაიტანა თავისი - ჩივამემ ძლიერად და ზუსტად დაარტყა საჯარიმო - 2:0.

საფიქრებელი იყო, რომ მეორე ტაიმს თბილისელები შედარებით მშვიდად ითამაშებდნენ. ვარაუდი არ გამართლდა. პირველი 5 წუთი "დინამო" ისევ აზარტულად უტევს. თუმცა, 50-ე წუთზე საკუთარ კარში გაშვებულმა დასანანმა გოლმა მატჩის სცენარი მაინც სხვაგვარად წარმართა. "დნეპრი" აქამდეც საკმაოდ უხეშად თამაშობდა, ერთი გოლის გაქვითვის შემდეგ კი მართალია, თავის "ტაქტიკაზე" ხელი არ აუღია, მაგრამ რაკილა ქულის გადარჩენის შანსი გაუჩნდა, შესამჩნევად გააქტიურდა. მასპინძლებმა ინიციატივა დაკარგეს და როლების ამ შეცვლას შეიძლება ცუდი შედეგიც მოჰყოლოდა. თბილისელებმა დროზე გამოასწორეს მდგომარეობა - 72-ე წუთზე დარასელიამ ეფექტური გოლი გაიტანა სტუმართა კარში და მატჩი ფაქტიურად ამით დასრულდა კიდევ.

**ი. ბერიაშვილი.**

**"ლელო", 14 სექტემბერი, 1982 წ.**